

東坡先生

毛詩正義

第十七册

毛詩正義卷第四十

唐國子祭酒曲阜縣開國子臣孔穎達等奉敕撰定
商頌譜

那 烈祖 玄鳥 長發 殷武

商者契所封之地有娥氏之女名簡狄者吞乙卵而生
契堯之末年舜舉爲司徒有五教之功乃賜姓而封之
正義曰殷本紀云契母曰簡狄有娥氏之女也爲帝
嚳次妃三人行浴見玄鳥墮其卵簡狄取吞之因孕生
契契長而佐禹治水有功帝舜乃封於商又中候亦有
其事文十八年左傳云高辛氏有才子八人天下之民
謂之八元舜臣堯舉八元使布五教於四方父義母慈

兄友弟恭子孝內平外成又尙書堯典云帝曰契汝作司徒敬敷五教五教在寬由此言之敷五教者是契之所爲舉八元使布五教者正謂舉契使布之也故云堯之末年舜舉爲司徒有五教之功也乃賜姓曰子而封之於商也中候握河紀云堯曰嗟朕無德欽奉丕圖賜示二三子斯封稷契皋陶賜姓號注云斯此封三臣賜姓號者契爲子稷爲姬皋陶未聞又契握湯說契云賜姓子氏以題朕躬注云題名也躬身也引孝經援神契曰堯知天命賜契子氏知有湯是堯賜之姓而封之商也本紀稱帝舜封契於商者長發箋云堯封之於商爲小國舜之末年益其土地爲大國是舜亦封之故歸之

舜也商者成湯一代之大號而此云商者契所封之地則鄭以湯取契之所封以爲代號也服虔王肅則不然襄九年左傳曰闕伯居商丕相土因之服虔云商丕地名相土契之孫因之者代闕伯之後居商丕湯以爲號又書序王肅注云契孫相土居商丕故湯因以爲國號而鄭立以爲由契封商者契之封商見於書傳史記中候其文証明經典之言商者皆單謂之商未有稱爲商丕者又相土居商丕以後不恆厥邑相土之於殷室雖是先公俊者譬之於周則公劉之儔耳旣非湯功所起又非王迹所因何當取其所居以爲代號也商之有契猶周之有稷成湯以商爲代號文王不以邰爲代號者

自契至湯雖則八遷而國號不改商名未易成湯以商受命故當以商爲號周卽處邠處豳國名變易大王來居周地其國始名曰周文王以周受命當以周爲號不得遠取邠也若然湯在亳地受命不以亳爲代號而禮記郊特牲云亳社北牖襄三十年左傳云烏鳴于亳社皆謂殷亡國之社也謂之亳社者禮存亡國之社以爲戒亳實湯所居地故指地而言以殷紂無道喪滅湯之所居欲使諸侯觀之思自保固故不舉代號而指亳社也亳是湯之所居耳及紂滅之時則在朝歌非復亳地也成湯之初以商爲號及盤庚遷於殷以後或呼爲殷故書序云盤庚五遷將治亳殷注云商家改號曰殷立

烏云殷受命咸宜殷武云撻彼殷武是其兼稱殷也雖
或稱殷不是全改商號故大明云殷商之旅蕩云咨汝
殷商皆取前後二號而雙言之是其不全改也 世有
官守十四世至湯則受命伐夏桀定天下 正義曰堯
以契爲司徒又封之商國子孫則當世爲諸侯或入列
王官故云世有官守國語云立王勤商十四世而興殷
本紀云契卒子昭明立卒子相土立卒子昌若立卒子
曹圉立卒子冥立卒子振立卒子微立卒子報丁立卒
子報乙立卒子報丙立卒子主壬立卒子主癸立卒子
天乙立是爲成湯是從契至湯爲十四世也中候雒子
命云天乙在亳東觀於洛黃魚雙躍出濟于壇黑鳥以

雒隨魚亦上化爲黑玉赤勒曰立精天乙受神福命之
子伐桀命克予商滅夏天下服是受命伐桀定天下也
後世有中宗者嚴恭寅畏天命自度治民祇懼不敢
荒寧後有高宗者舊勞於外爰泊小人作其卽位乃或
諒闇三年不言言乃雍不敢荒寧嘉靜殷邦至於小大
無時或怨 正義曰此尙書毋逸文也彼注云中宗謂
太戊也高宗謂武丁也舊猶久也爰於泊與也武丁爲
太子時殷道衰爲其父小乙將師役於外與小人之故
言知其憂樂也作起也諒闇轉作梁闇楣謂之梁闇廬
也小乙崩武丁立憂喪三年之禮居凶廬柱楣不言政
事 此三王有受命中興之功時有作詩頌之者 正

義曰受命謂成湯也中興謂中宗高宗也商頌五篇唯
有此三王之詩故鄭歷言其功德也殷本紀云太戊立
亳有祥桑穀共生於朝一暮大拱太戊懼問伊陟伊陟
曰臣聞妖不勝德帝之政其有闕與帝其脩德太戊從
之而祥桑穀枯死殷復興諸侯歸之故稱中宗禮記喪
服四制曰書云高宗諒闇三年不言善之也王者莫不
行此禮何以獨善高宗高宗者武丁武丁者殷之賢王
繼世卽位而慈良於喪當此之時殷衰而復興禮廢而
復起故善之善之故載之書中高而宗之故謂之高宗
是中宗高宗中興也由此三王皆有功德時人有作詩
頌之者那序云祀成湯是頌成湯也烈祖序云祀中宗

是頌中宗也立鳥殷武序皆云高宗長發居中從可知是立鳥三篇頌高宗也此頌之者皆在崩後頌之那祀成湯經稱湯孫箋以湯孫爲太甲則那之作當太甲時也烈祖祀中宗箋稱此祭中宗諸侯來助明是其崩之後或子孫之時未知當誰世也立鳥祀高宗箋以祀當爲裕高宗崩而始裕祭於契之廟歌是詩焉是其崩後可知也殷武云祀高宗則亦在其崩後立鳥殷武旣是崩後則知長發之作亦在崩後矣長發述其生存之日禘祭先王殷武述其征伐荆楚脩治寢室皆是崩後追述之也商德之壤武王伐紂乃以陶唐氏火正闕伯之墟封紂兄微子啟爲宋公代武庚爲商後正義曰

商德之壞謂紂時也樂記說武王伐紂旣下車而投殷
之後於宋是伐紂卽封微子昭元年左傳曰昔高辛氏
有二子伯曰閼伯季曰實沈居于曠林不相能也日尋
干戈以相征討后帝不臧遷閼伯于商丘主辰商人是
因故辰爲商星襄九年左傳曰陶唐氏之火正閼伯居
商丘祀大火而火紀時焉相土因之故商主大火以此
言之是宋居閼伯故地故漢書地理志云周封微子於
宋今之睢陽是也本陶唐氏火正閼伯之墟鄭取其言
以爲說也書傳云武王殺紂繼公子祿父史記衛世家
云武王已克殷紂復以殷餘民封紂子武庚祿父以奉
其先祀是武王初殺紂以武庚爲商後也至周公攝政

武庚叛而誅之乃命微子代武庚爲商後書序云成王
既黜殷命殺武庚命微子是命微子在成王時也今因
伐紂之下卽連言封微子於宋代武庚爲商後者以封
之於宋竟爲商後以宋是武王所封故終言之 其封
域在禹貢徐州泗濱西及豫州盟豬之野 正義曰禹
貢徐州云泗濱浮磬豫州云導荷澤被盟豬地理志云
盟豬澤在梁國睢陽東北是盟豬在豫州地理志云宋
地今之梁國沛楚山陽濟陰東平及東都之須昌壽張
皆宋分也據時驗之是宋之封域東至泗濱西至盟豬
也 自後政衰散亡商之禮樂七世至戴公時當宣王
大夫正考父者校商之名頌十二篇於周太師以那爲

首歸以祀其先王 正義曰微子爲商之後得行殷之
禮樂明是商頌皆在宋矣於後不具明是政衰而失之
那序云微子至於戴公其間禮樂廢壞是散亡商之禮
樂也史記宋世家云微子啟卒弟仲衍立卒子宋公稽
立卒子丁公申立卒子湣公共立卒弟煬公熙立湣公
子鮒祀殺煬公而自立是爲厲公卒子釐公舉立卒子
惠公覲立卒子哀公立卒子戴公立自微子至戴公凡
十君除二及餘八君是微子之後七世至戴公也世家
又云惠公四年周宣王卽位戴公二十九年周幽王爲
犬戎所殺考校其年宣王以戴公十八年崩是戴公當
宣王時也正考父考校商之名頌十二篇於周之太師

以那爲首魯語文也韋昭云名頌頌之美者然則言校者宋之禮樂雖則亡散猶有此詩之本考父恐其舛謬故就太師校之也此頌皆爲祀先王而作故知校之既正歸以祀其先王也孔子錄詩之時則得五篇而已乃列之以備三頌著爲後王之義監三代之成功法莫大於是矣正義曰今詩是孔子所定商頌止有五篇明是孔子錄詩之時已亡其七篇唯得此五篇而已王者存二王之後所以通天三統夏之篇章旣已泯棄唯有商頌而已孔子旣錄魯頌同之二王之後乃復取商頌列之以備三頌著爲後王之義使後人監視三代之成法其法莫大於是言聖人之有深意也問者曰列

國政衰則變風作宋何獨無乎曰有焉乃不錄之王者
之後時王所客也巡守述職不陳其詩亦示無貶黜客
之義也 正義曰巡守之陳詩者以觀民之好惡示有
刺責則貶黜之今不陳其詩示無貶黜客之義亦旣示
無貶黜不陳惡詩雖有其美者亦不得復采故所以無
宋詩也示無貶黜者示法而已其有大罪亦當如魯譜
所云侯伯監之行人書之不得全無貶黜故春秋之時
杞爲伯爵是其爲時王所黜也 又問曰周太師何由
得商頌曰周用六代之樂故有之 正義曰以周用六
代之樂樂章固當存之故得有商頌也然則自夏以上
周人亦存其樂而得無其詩者或本自不作或有而滅

亡故也此商頌五篇自是商世之書由宋而後得存故鄭爲譜因商而又序宋也 那一章二十二句至爲首

正義曰那詩者祀成湯之樂歌也成湯創業垂統制禮作樂及其崩也後世以時祀之詩人述其功業而作此歌也又總敘商頌廢興所由言微子至於戴公之時其間十有餘世其有君閭政衰致使禮樂廢壞令商頌散亡至戴公之時其大夫有名曰正考父者得商頌十二篇於周之太師此十二篇以那爲首是故孔子錄詩之時得其五篇列之以備三頌也殷本紀云主癸生天乙是爲成湯案中候雒子命云天乙在亳注云天乙湯名是鄭以湯之名爲天乙也則成湯非復名也周書諡

法者周公所爲禮記檀弓云死諡周道也則自殷以上
未有諡法蓋生爲其號死因爲語耳諡法安民立政曰
成除殘去虐曰湯蓋以天乙有此行故號曰成湯也長
發稱武王載旆又呼湯爲武王者以其伐桀革命成就
武功故以武名之非其號諡也國語云校商之名頌十
二篇此云得商頌十二篇謂於周之太師校定眞僞是
從太師而得之也言得之太師以那爲首則太師先以
那爲首矣且殷之創基成湯爲首那敘云祀成湯明知
無先那者故知太師以那爲首也經之所陳皆是祀湯
之事毛以終篇皆論湯之生存所行之事鄭以奏鼓以
下言湯孫太甲祭湯之時有此美事亦是祀湯而有此

事故序總云祀成湯也 箋禮樂至厲公 正義曰禮樂廢壞者正謂禮不行樂不用故令之廢壞廢壞者若牆屋之不脩也但禮事非一箋略舉禮之大者以言焉由君不復行禮有司不復脩習故忘其禮之儀制由君不復用樂樂師不復脩習故失其聲之曲折由是禮樂崩壞故商詩散亡也知孔子之時七篇已亡者以其考甫校之太師歸以祀其先王則非煩重蕪穢不是可棄者也而子夏作序已無七篇明是孔子之前已亡滅也世本云宋湣公生弗甫何弗甫何生宋父宋父生正考甫正考甫生孔父嘉爲宋司馬華督殺之而絕其世其子木金父降爲士木金父生祁父祁父生防叔爲華氏